

दिनांक 18.08.2025
 समय: 18.45 बजे
 आकाशवाणी जयपुर-अजमेर
 प्रादेशिक समाचार

- केन्द्रीय कृषि मंत्री शिवराज सिंह चौहान कीड़ा मारण री नकली दवाइयां अर नकली खाद-बीज बणावण वाली कम्पनियां रे खिलाफ करड़ी कार्रवाई माथे ज़ोर दीनो।
- राज्य मांय गिव-अप अभियान रा तैत हाल ताई 26 लाख ऊं बत्ता लोग नाम हटवाया-करीब 53 लाख लोगां ने खाद्य सुरक्षा योजना ऊं जोड़ी ज्या।
- प्रदेश मांय बुजुर्गा ने घर बैठ्यां दवाइयां मुहैया करावण सारू पायलट प्रोजेक्ट सरू कर्यो जावेला।
- राज्य रा ऊगणी हलका मांय हल्की बारिश —आतूणी हलका मांय गर्मी रो असर बध्यो।

केन्द्रीय कृषि अर किसान कल्याण मंत्री शिवराज सिंह चौहान कीड़ा मारण री नकली दवाइयां, नकली खाद अर बीज बणावण वाली कम्पनियां रे खिलाफ करड़ी कार्रवाई रा हुकम दीना है। श्री चौहान मध्यप्रदेश रा छीरखेड़ा गांव मांय कीड़ा मारण री नकली दवाइयां अर नकली खाद रे कारण सोयाबीन री साखां रा खराबा रो जायजो लियां पाछे बोल रह्या ह्या। वे किसानां सागे बातचीत ई कीनी। कृषि मंत्री कह्यो के नकली खाद-बीज रे कारण काश्तकारां री साखां मांय खराबो व्हेवण ने गंभीरता ऊं लियो जावेला।

उपराष्ट्रपति चुनाव सारू एनडीए रा उम्मीदवार बणायी ज्या महाराष्ट्र रा राज्यपाल सी.पी. राधाकृष्णन आज नई दिल्ली मांय प्रधानमंत्री नरेंद्र मोदी सागे मुलाकात कीनी। प्रधानमंत्री सोशल मीडिया पोस्ट रे जरिये श्री राधाकृष्णन ने उपराष्ट्रपति चुनाव मांय एनडीए रा उम्मीदवार बणाया जावण रो स्वागत कीनो। वे आस जतायी के श्री राधाकृष्णन कानी ऊं करीजी जनता री लंबी सेवा अर न्यारा-न्यारा हलकां रो अनुभव देश ने समृद्ध बणावेला।

प्रधानमंत्री नरेन्द्र मोदी जनता ऊं देशी सामान काम लेवण बाबत् कह्यो है। वे जनता ऊं हाथ री कारीगरी ऊं बण्या सामान री खरीदी करण अर ई री जाणकारी माय हैंडलूम, माय प्राइड अर माय प्रोडक्ट माय प्राइड हेशटैग सागे सोशल मीडिया माथे पोस्ट करण बाबत् ई कह्यो। ई अभियान रो मकसद देश री हथकरधा विरासत रा प्रति मान बधावणो अर हाथ री कारीगरी ऊं सामान बणावण वालों री पहुंच बधावणो है।

ऊर्जा मंत्री हीरालाल नागर आज नई दिल्ली मांय लोकसभा अध्यक्ष ओम बिरला ऊं मुलाकात कीनी। संसद भवन मांय व्ही मुलाकात रे दौरान कोटा मांय भामाशाह मंडी ने बड़ी करण रा बारा मांय बातचीत व्ही। ई सागे ई कोटा—बूंदी संसदीय हलका मांय विकास रा बारा मांय ई चर्चा करीजी।

केन्द्रीय पर्यटन अर संस्कृति मंत्री गजेन्द्र सिंह शेखावत आज नई दिल्ली मांय रेलमंत्री अश्विनी वैष्णव ऊं मुलाकात कीनी। ई दौरान वे जोधपुर—दिल्ली बीचे नुवी वंदे भारत रेलगाड़ी चलावण री अरज कीनी। शेखावत कहयो के इण ऊं जोधपुर सागे ई जयपुर री जनता ने ई फायदो मिलेला। श्री शेखावत आ रेल जोधपुर ऊं संवारे बेगी चलावण अर वां ई दिन सिंज्यां पाछी दिल्ली ऊं जोधपुर ओड़ी चलावण री अरज कीनी। रेलमंत्री वां ने जनता रा भला ने ध्यान राखता थकां ई बारा मांय बेगो ई फैसलो करण रो भरोसो दिरायो।

राज्य मांय गिव—अप अभियान रा तैत हाल ताँई 26 लाख ऊं बत्ता लोग मर्जी ऊं खाद्य सुरक्षा योजना रो फायदो लेवणो छोड़ दीनो है, जद के 27 लाख ऊं बत्ता लोगां रा नाम ई—केवाईसी नी करावण रे कारण योजना ऊं हटा दिया ज्या है। गिव—अप अभियान 31 अगस्त ताँई चलायो जा रहयो है। ई बीचे 53 लाख पात्र लोगां ने राष्ट्रीय खाद्य सुरक्षा योजना ऊं जोड़ी ज्या है। सम्पन्न पिरवारां कानी ऊं मर्जी ऊं नाम हटवावण पाछे वंचित तबका री जनता ने खाद्य सुरक्षा मिल सकेला।

राजस्थान 6 करोड़ 20 लाख आभा आई.डी. बणा र देश मांय दूजी ठौड़ माथे है। ई सागे ई आभा ऊं जुड़या 1 करोड़ 68 लाख ऊं बत्ता ई—हेल्थ कार्ड ई बणा दिया ज्या है। मुख्यमंत्री भजनलाल शर्मा चिकित्सा अर स्वास्थ्य विभाग रा अहलकारां सागे मीटिंग पाछे आ जाणकारी दीनी। मीटिंग मांय श्री शर्मा अहलकारां ने बुजुर्गा ने घर बैठ्यां दवा मुहैया करावण री योजना रो फायदो देवण सारु परियोजना री सरुआत करण रा हुकम ई दीना।

केन्द्र सरकार राष्ट्रीय पशुधन मिशन रा तैत राजस्थान ने 4 करोड़ 11 लाख रुप्या ऊं बत्ती रकम जारी कीनी है। पशुपालन मंत्री जोराराम कुमावत बतायो के आ रकम खुरपका, मुंहपका, बूसेला अर दूजी बीमारियां माथे काबू करण सारु काम ली जावेला। श्री कुमावत बतायो के राष्ट्रीय पशुधन मिशन रा तैत उद्यमिता विकास कार्यक्रम सारु ई राज्य ने 4 करोड़ 8 लाख रुप्या री सब्सिडी मिली है।

उपमुख्यमंत्री दीया कुमारी आज राजसमंद जिला रा भोप जी की भागल गांव मांय आंगनबाड़ी केंद्र रो दौरो कीनो। वे बच्चां ने दिया जावण वाळा सुबीतां, पोषण, साफ—सफाई अर भणाई—लिखाई रा कामकाज रो जायज़ो लीनो। दीया कुमारी बच्चां सागे बातचीत ई कीनी। खबरनवीसां सागे बातचीत करता थकां उपमुख्यमंत्री कहयो के सरकार री बच्चां ने बेहतर पोषण अर तालीम मुहैया करावण री मंशा है, जर्दीं सारु आंगनबाड़ी केन्द्रां रा विकास माथे खास ध्यान दियो जा रहयो है।

भरतपुर ज़िला रा रूपवास मांय आज एक पिकअप पलट जावण ऊं 15 जणा घणा जख्मी व्हे ग्या, ज्यां ने आरबीएम अस्पताल मांय भर्ती करायी ज्या है। चक सामरी गांव रा रेहवासी अ लोग माता वैष्णौ देवी रा दर्शन सारू जा रहया हा।

राष्ट्रीय अनुसूचित जाति आयोग काल प्रदेश रा दौरा सारू आवेला। दो दिन रा दौरा रा तैत आयोग रा राज्य सरकार, पुलिस रा आला अहलकारां, जनता रा नुमाइन्दां अर अनुसूचित जाति री जनता रा कल्याण ऊं जुडी संस्थावां सागे चर्चा करेला।

सामाजिक न्याय अर अधिकारिता विभाग रा निदेशक आशीष मोदी बतायो के ई दौरान आयोग रा अध्यक्ष किशोर मकवाना सदस्यां सागे अनुसूचित जाति वर्ग रा सामाजिक उत्थान सारू चलाई जा रही न्यारी-न्यारी योजनावां रो जायज्ञो लेवेला। आयोग रो जयपुर कने जामडोली मांय छात्रावास रो ई दौरो करण रो कार्यक्रम है।

सिरोही ज़िला रा आदिवासी हलकां मांय महिलावां जंगलात हलका मांय व्हेवण वाढी साख ककोड़ा ऊं अचार बणा रही है। राजीविका अर प्रशासन री भेड़ी कोशिशां ऊं आदिवासी महिलावां ने खुद रे पाण ऊबी करण रा मकसद आ पहल करीजी है। पिंडवाड़ा रा एस.डी.एम. मनसुख डामोर बतायो के महिला स्वयं सहायता समूहां री ओर ऊं बणायो जा रहयो अचार वठे रा बाजार सागे ई दूजा ज़िलां रा बाजारां तांई ई पूगयो जा रहयो है।

पाली ज़िला मांय अपराधां री रोकथाम सारू खास एरिया डोमिनेशन अभियान चलायो जा रहयो है। ई रा तैत न्यारी-न्यारी ठोड़ां अपराध री सोच राखण वाढां, तस्करां अर हिस्ट्रीशीटरां रे खिलाफ कार्यवाही करी जा रही है। एस.पी. पूजा अवाना बतायो के परिवादियां री सुणवाई पाचे पुलिस री ओर ऊं वां री राय ई ली जा रही है।

प्रदेश रा ऊगणी हलका मांय कठे-कठे हल्की बारिश रो दौर चाल रहयो है, हालांकि आतूणी हलकां मांय गर्मी रो असर ओजू बध ग्यो है। जैसलमेर मांय पारो लारला 2-3 दिन ऊं 40 डिग्री सेल्सियस रे पार दर्ज कर्यो जा रहयो है, जद के बाड़मेर, जोधपुर, फलौदी, जालौर, श्रीगंगानगर अर बीकानेर मांय अधिकतम तापमान 38 डिग्री सेल्सियस ऊं ऊंचो रिकॉर्ड कर्यो जा रहयो है। सीकर, अलवर, चित्तौड़गढ़ अर जयपुर समेत कई ठोड़ां दिन री बगत पारो 35 डिग्री सेल्सियस ऊं ऊंचो नापी ज्यो। मौसम विभाग राज्य रा लंकाऊ हलका मांय आवता तीन-चार दिन बारिश रो दौर चालतो रेहवण रा आसार जताया है। आज 27 ज़िलां मांय बरसात रो येलो अलर्ट जारी करी ज्यो है।

जैसलमेर ज़िला रा रामदेवरा मांय भरण वाढा मेळा मांय पूगण वाढा जातरुआं री मोटी तादाद ने ध्यान राखता थकां वठे रा रेलवे टेशन ने साफ-सुथरो राखण सागे ई खास व्यवस्थावां करी जा रही है। जोधपुर रा मंडल रेल प्रबंधक अनुराग त्रिपाठी आज रामदेवरा रेलवे टेशन रो दौरो कर र व्यवस्थावां रो जायज्ञो लीनो। वे बतायो के मुसाफिरां रा सुबीता सारू दो रेलां चलायी ज्यी है अर आवता दिनां आं री तादाद मांय बधोतरी करी जावेला।
